



Comunu de Quartu Sant'Aleni



Arribat su progetu “Adotta un cane dal canile” po donai una famìllia a ònnia animali

Partit in Quartu su progetu “Adotta un cane dal canile” chi punnat a prevenni chi sa struttura conventzionada “Canile Shardana” si prèngiat prus de cantu podit, donendi in càrrigu is animalis a assòtzis animalistas regionalis e natzionalis cun agiudus in dinai, po ddus passai a cou a citadinus privaus, fadendi opera de sensibilizatzioni.

Sa punna de su bandu est crara: po cumbati su problema de is canis chena de dobidori e assigurai una vida in domu a cantu prus canixeddus possìbili tocat a fai in modu chi

su passàgiu in canili siat su prus curtzu possìbili, lassendi a disponimentu is domixeddas chi serbint po poni in siguresa is animalis chi arrògliant in su territòriu comunali. Intra is obietivus de s'Amministrazione Comunali nc'est puru de abuidai is domixeddas giai impegnadas po chi su Comune puru potzat spendi prus pagu po ddus manteni. Po arrannesci in custu programma tocat a incarrerai a s'agiudai de pari a pari cun is assòtzius de voluntàrius po promovi is adotzioni de is canis chi bivint in su canili conventzionau cun su Comune.

Po ònnia cani pigau in càrrigu de is Assòtzius at a essi donau unu "Contributo di adozione dal canile" de 300,00 èurus po is canis finas a un'annu o puru po is canis mannos de edadi, ma finas a 10 chilus; po is canis de 1 a 9 annus e po cussus finas a 20 chilus ant a essi donaus 1000,00 èurus; po is canis bècius chi tenint prus de 10 annus o po is chi pesant prus de 20 chilus, o ancora po is canis malàdius e/o cun disabilitadi ant a essi donaus 1500,00 èurus, po coberri una parti de is spesas po curai e donai a papai a s'animali. Is assòtzius animalistas interessaus a s'adotzioni de unu o prus animalis ant a depi presentai una rechesta a su Comune de Quartu, imperendi sa documentatzioni dedicata. A cou de essi formalizau s'adotzioni s'Assòtziu s'at a podi agiudai in sa circa de is privaus adotantis cun atividadis de sensibilizatzioni. Intra is òbligis chi benint de su si fai càrrigu de is canis de parti de is Assòtzius, ddoi sunt sa garantzia de unu acorru lìmpiu innoi s'animali bivat beni, sa pulitzia de is canis e totu, is curas cun controllus sanitàrius cadentzaus e tratamentus contras is parassitas, operatzioni chi serbint, vacinus, sterilizatzioni e cosa de papai giusta po issus e chi ddis bastit. Su Comune at a podi decidi a discretzioni sua de fai controllus de tanti in tanti, po biri chi is animalis sunt tentus beni, cun s'agiudu de is Funtzionàrius de su Setori Ambienti, Protetzioni Civili e Transizioni Ecològica e de su Nùcleu de vigilàntzia Ambientali de sa Polizia Municipali e chi serbit puru de is òrganus de controllu incarrigaus. Is adotantis ant a depi permiti a su personali incarrigau de su

Comunu de Quartu Sant’Aleni de averiguai chi s’identidadi de su cani siat sa pròpriu de su cani pigau in càrrigu, e puru chi is animalis siant pulius, curaus e chi papint beni. Chi custas règulas non benint respetadas no at a essi donau su contributu.

Is interessaus ant a depi avantzai istàntzia PO SA MANIFESTATZIONI DE INTERESSU PO PIGAI PARTI A SU PROGETU “ADOTTA UN CANE DAL CANILE” a su Comunu de Quartu Sant’Aleni feti cun una PEC a s’indiritzu protocollo@pec.comune.quartusantelena.ca.it cun ogetu: Manifestazione Interesse “ADOTTA UN CANE DAL CANILE” finas a is 13:00 de su 15/12/2024.

Su bandu s’agatat in su giassu de su Comunu de Quartu Sant’Aleni in sa setzioni “Bandi e Gare”. Is documentus podint essi scarrigaus a su liòngiu a sighiri: <https://servizionline.comune.quartu.ca.it/portale/trasparenza/trasparenzaamministrativa.aspx?CP=1168>